



**PARTURE PARTANGIANGAN KELUARGA DI GANUP BAGAS
HKBP SA – RESSORT TANJUNG MORAWA
DISTRIK XXIX DELI SERDANG
KAMIS, 13 MARET 2022**



1. **Marende BE No. 574 : 1 – 2 “Puji Ma Debata” BL. 574**
Ayat 1 Puji ma, puji ma Debata/ Na niainNa do umpuji Debata/ Nunga sesa dosami/ Malum dohot rohami/ Puji ma, puji ma Debata/ Na niainNa do umpuji Debata
Ayat 2 Olophon, olophon Tuhan i/ Hatindanghon denggan ni basaNa i/ Sai arahon donganmi/ Ro tu sipalua i/ Olophon, olophon Tuhan i/ Hatindanghon ma denggan basaNa i
2. **VOTUM :**
U : Marhitehite Goar ni Debata Ama, dohot Goar ni AnakNa Tuhan Jesus Kristus, dohot Goar ni Tondi Parbadia na tumempa langit dohot tano on! Amen! Luluhon ma ahu, ale Debata, jala parbadahon badangku dompak bangso na so daulat roha, sai palua ma ahu sian baa siulahon sipaotooto dohot hajengkelon. Ai Ho do Debata haroroan ni hagogoongku. Tongos ma hatiuronMu dohot hatigoranMu, angka na manogu ahu, pataru ahu tu dolok ni habadianMu dohot tu ingananMu. **Haleluya!**
Martangiang ma hita: Ale Amanami Parasi roha na sumurung, Debata ni hatuaonnami! Huingot hami do di angka ari on panaonomu dohot hamamate ni Tuhan Jesus Kristus, Tuhannami. Pahibul ma rohanami jala parbadiai mamingkiri sude na tinaonNa i. Patandahon ma tu hami dosanami, asa diarsakhon rohanami, asa hupompomi hami hisaphisap dohot sangkapsangkap ni rohanami, jala asa hupasaut hami lomo ni roha ni na manobus hami, asa martua hami marhite sian i ro disalelenglelengna. Sai patupa ma i di hami marhitehite Tuhan Jesus Kristus, Anak haholongan ni rohaM. Amen!
- S : Amen.**
3. **E P I S T E L : 1 MUSA 15 : 1 – 6**
U : Tajaha ma Epistel di Partangianganta borngin on ima na tarsurat di **1 Musa 15 : 1 – 6** “Dung salpu angka jamita ondeng ro ma hata ni Jahowa tu si Abram marhitehite alatan, ninna ma: Unang ho mabiar ale Abram. Ahu do lombulombum, upam mansai balga.”

K : Alai ninna si Abram ma: Oe ale Tuhan Jahowa, aha ma lehononmu di ahu?
Sai na punu do ahu, si Elieser na sian Damaskus na ma sitean bagashu.

U : Angkup ni ninna si Abram: Ndi, ndang adong pinomparhu dilehon ho, jala ida, anak na tubu di bagasan jabungku na ma sitean ahu.

K : Dung i ro ma hata ni Jahowa mandok tu ibana: Nandang ibana tumean ho, na ruar sian butuham, ibana tumean ho.

U : Dung i ditogihon Tuhan i ibana ruar tu balian, jala ninna: Ua tailihon ma dompak langit i jala bilangi angka bintang, molo habilangan ho angka i. Dung i didok muse tu ibana: Songon i ma pinomparmu sogot.

K : Jadi porsea ma si Abram di Jahowa, gabe hatigoranna do i dietong Jahowa.

U : Ido sahatna. ***Martua do angka natumangihon Hata ni Debata ala naumpeopsa.***

S : **Amen!**

4. Marende BE No. 28 : 1 – 2 “Hata Ni Jahowa”

BL. 203

Ayat 1 Hata ni Jahowa/ Sipadame jolma/ Hangoluan i/ Halalas ni roha/ Siapuli roha/ Ni na marsak i/ Gogo ni Debatangki/ Paluahon na porsea/ Sian nasa jea

Ayat 2 Nasa tinahiNa/ Tagan so ditompa/ Tano on dope/ Nang na tinuduan/ Ni sude pelean/ Jumpang do muse/ Sangkap ni AmaNa i/ Dipatulus Jesus kristus/ Jolma i ditobus

5. JAMITA: PILIPI 3 : 17 – 21 (Martangiang, manjaha turpuak, manjaha Jamita) SATIA MANGIHUTHON DEBATA

Damang/Dainang/Dohot Dongan na hinaholongan di bagasan goar ni Tuhan Jesus Kristus... Adong sada pandohan na mansai arga na sian Mendiang Ephorus HKBP Emeritus Pdt. Justin Sihombing na mandok: *Jamita mi do ngolum, ngolumi do jamitam.* Pandohan on marlapatan ma i, jamita na mangolu dohot ngolu na gabe jamita ni sahalak par-Barita na Uli mansai marpanghorhon do i di na umbege jamita i. Tiruan na sintong mansai marpanghorhon situtu do i lumobi molo boi diida jala dihilala. Alai di partingkian sinuaeng on, nunga tung otik jolma na boi gabe tiruan maradophon angka dongan humaliang. Boi dohonon “*Krisis keteladanan*” do nuaeng jolma di portibion, ala sude masiboan doring na be. Jala nuaeng on ndang piga jolma na olo marguru manang maniru angka nauli na denggan na binahen ni angka donganna. Hata “*gengsi*” do nuaeng na masa, lumobi ma molo tiruani marharoroan sian jolma na ditoru ni kalasna. Hape na gabe tiruan ndang ditontuhon marhite umur, pangkat, dohot lan na asing alai hataun do. Hataun on

marharoroan do on sian Tuhan Debata marhite Tuhan Jesus Kristus. Ringkot do adong tiruan dibagasan ngolunta ganup, alai unang gabe manggantihon hajongjongan ni Jesus i dibagasan ngolunta. *Kita bisa meneladani orang lain, meniru orang lain dengan segala perbuatan baiknya tetapi jangan sampai menggeser posisi Yesus atau mendewakan orang lain dalam kehidupan kita ini.*

Diturpukta on mansai tangkas didok Apostel Paulus di ayat 17: *Rap sitiru ahu ma hamu ale angka dongan, ninna ibana.* Molo didok Apostel Paulus di turpuk on sitiru ahu ma hamu tontu na adong ma sitiruon sian ibana. Diama i:

1. Mangolu di bagasan parsihohoton mangoloi Kristus Jesus

Sada sitiruon na arga na sian Apostel Paulus ima parsihohotonna mangoloi Kristus Jesus, nang pe ingkon marsitaonon ibana, nang pe ingkon mardongan ilu dohot marungkil ibana alani i. Nandang dietong Apostel Paulus harugion mangihuthon Kristus Jesus, baliksa do. Ai dirajumi ibana do sitaonon na dihasiangan on hira na so adong do martimbanghon hasangapon sipapataron ni Debata tu ibana sogot (pat. Rom 8:18). Laos i do na nidok apostel Paulus tu huria Pilippi asa maniru ibana naung mangolu di bagasan parsihohoton mangoloi Kristus Jesus. Hita pe amang/inang – godang do angka na masa dingolunta na sipata boi mambahen ganggu haporseaonta dohot mambahen gale parsihohotonta mangoloi Kristus i. Alai nang pe godang angka na maol na taadopi, borat manang dokdok pe angka na tabolus hinorhon ni angka panosaknosak ni na so manghalomohon Jesus di portibion, sada na ingkon siparahononta ima hot ma hita di haporseaonta i, unang ganggu hita. Ido na pinapatar ni apostel Paulus dison: tiruan di haporseaon dohot di parsihohotonna mangoloi Kristus Jesus. Ai didok Tuhan Jesus do di Mateus 5:11-12 *Martua ma hamu, molo diinsahi halak hamu manang dipaburuburu manang dipatubutubu ragam ni hata na roa na so tutu dompak hamu ala ni Ahu. Las ma rohamuna jala marolopolop, ai godang do upamuna di banua ginjang i, ai songon i do dipaburuburu angka panurirang na jumolo sian hamu.*

2. Fokus tu Sangkap hatuaon na ummuli na diparade Tuhan i

Tiruan na gumodang na pinapatar ni apostel Paulus dison ima: tiruan di panghirimon sipasahaton ni Tuhan Debata marhite Tuhan Jesus Kristus tu angka na porsea jala na sai satia manghangoluhon haporseaonna di tonga ni portibion. Alana ndang saleleng na hita diportibion, adong do huta sihirimonta dibagasan haporseaonta ganup. Alani i dipaingot do hita di 1 Korint 15, 19 *“Alai anggo holan di tano on hita manghirim di kristus i, jolma na dumangol do hita sian saluhutna (Jikalau kita hanya dalam hidup ini saja menaruh pengharapan pada Kristus, maka kita adalah orang-orang yang paling malang dari segala manusia.)”* Marhite i dipaingot hita asa unang lohoh rohanta di portibion, ai surgo i do sambulonta.

Singkop las ni rohanta molo partohap hita di Banua Ginjang hombar tu lomo ni roha ni Tuhan Debata Jahowa. Alani i tatiru ma Apostel Paulus i na sai tongtong marpanghirimon di bagasan haporseaonna nang pe sai dokdok na masa na ni adopanna di bagasan ngoluna alani haporseaonna i. Loas ma Tuhan Debata manumpak ngolunta patureturehon ngolunta hombar tu lomoNa, nang sipata ingkon bolusonta angka arsak, sahit, las niroha, alai saluhutna mambahen na denggan dibagasan ngolunta. Holan on: hot ma panghirimonta dohot haporseaonta di Tuhan Jesus Kristus. Amen!

6. **Marende BE No. 692 : 1 “Hupasahat Tu TanganMu” BL. 692**
Hupasahat tu tanganMu ma tondingki/ Ndang olo sirang ahu sian Tuhanki/ Ho do pangkirimonku nang ngolungki/ Halasan ni rohangu o Tuhanki
7. **Tangiang Pangondianon : (Sahalak Sian Anggota Keluarga)**
8. **Marende BE No. 690 : 1 – 2 “Hibul Rohangku ” BL. 690 (P Pelean)**
Ayat 1 Hibul rohangku tu Tuhan Jesus / Sude ngolungku di Tuhan Jesus / Ihuthononku do Tuhan Jesus / Ndang olo au sumurut be
Ayat 2 Sai hutundalhon haportibion / Silang ni Kristus ma hudapothon / Sai hutundalhon haportibion / Ndang olo au sumurut be
9. **PANUTUP : Tangiang Ale Amanami : Amen, Amen, Amen.**
-

Pelean Partangiang Keluarga di Ganup Bagas

Kamis 13 Maret 2022

Sian Keluarga :.....

Sektor :.....

Jumlah : Rp.